


---

---

ԱԿԱԴԵՄԻԿՈՍ ՌՈՒԲԵՆ ՋԱՐՅԱՆ  
(Ծննդյան 100-ամյակի առթիվ)

Լրացավ ՀՀ ԳԱԱ ակադեմիկոս Ռուբեն Ջարյանի ծննդյան 100-ամյակը:

Ռուբեն Վարոսի Ջարյանը (Ղազանյան) ծնվել է 1909 թվականի սեպտեմբերի 1-ին, Ալեքսանդրապոլ քաղաքում: Շուտով նրանց ընտանիքը տեղափոխվում է



Թիֆլիս, որտեղ էլ անցնում են նրա մանկության և պատանեկության տարիները:

1929-ին Ռ. Ջարյանն ավարտում է Թիֆլիսի Ալ. Մյասնիկյանի անվան մանկավարժական ուսումնարանն ու աշխատանքի անցնում Ախալքալաքի միջնակարգ դպրոցում՝ որպես հայոց լեզվի և գրականության դասատու՝ պաշտոնավարելով մինչև 1932 թվականը: 1933-ին Ռ. Ջարյանը նշանակվում է Թիֆլիսի «Գրոհ» հանդեսի պատասխանատու քարտուղար, իսկ 1934-ին դառնում Հայաստանի խորհրդային գրողների միության անդամ:

1936-ին Ռ. Ջարյանն ավարտում է Երևանի պետական համալսարանի լեզվագրական ֆակուլտետն ու 1937-1939 թթ. մանկավարժական գործունեություն ծավալում Երևանի մանկավարժական ուսումնարանում: 1938-ին սկիզբ է առնում Ռ. Ջարյանի գիտական գործունեությունը. նա աշխատանքի է անցնում ԽՍՀՄ ԳԱ Հայկական մասնաճյուղի գրականության և լեզվի ինստիտուտում՝ որպես կրտսեր գիտաշխատակից:

1940-ին Ռ. Ջարյանը պաշտպանում է թեկնածուական դիսերտացիա «Աբովյանի «Նախաշավիղը» և նրա պատմությունը» թեմայով: Ի դեպ, Ջարյանին գրականագետի համբավ բերեց հենց «Աբովյանի կյանքը (համառոտ ակնարկ)» աշխատությունը, որը հրատարակվել էր 1939-ին, այնուհետև վերահրատարակվել էր 1940-ին: Եվ պատահական չէ, որ 1984-1990 թթ. Ռ. Ջարյանը ղեկավարել է Աբովյանի տուն-թանգարանի գիտական խորհրդի աշխատանքները:

1940-ից 1943-ը Ռ. Ջարյանը եղել է ԽՍՀՄ ԳԱ Հայկական մասնաճյուղի գրականության և լեզվի ինստիտուտի գիտական խորհրդի անդամ: Զուգահեռաբար ղեկավարել է Հայպետհրատի գեղարվեստական գրականության բաժինը (1938-1947), եղել «Սովետական գրականություն» ամսագրի պատասխանատու խմբագիրը (1941-1943):

1950-ից Ռ. Ջարյանի գործունեությունն անխզելիորեն կապվում է ՀԽՍՀ գիտությունների ակադեմիայի հետ. նա աշխատանքի է անցնում ԳԱ արվեստների

պատմության և տեսության սեկտորում որպես ավագ գիտաշխատող, իսկ երեք տարի անց՝ 1953-ին, նշանակվում սեկտորի վարիչ՝ պաշտոնավարելով մինչև 1958-ը: Սեկտորում, որը կոչված էր հավաքագրել այդ բնագավառում հանրապետության առաջատար գիտական ուժերը՝ մեր գեղարվեստական հարուստ, հսկայածավալ ժառանգության բազմակողմանի ուսումնասիրման համար, գործում էին Երաժշտության, Թատրոնի, Կերպարվեստի և Ճարտարապետության բաժինները:

1958 թ. մայիսի 1-ին Հայկական ՍՍՌ գիտությունների ակադեմիայի նախագահության որոշմամբ Արվեստների պատմության և տեսության սեկտորը վերակազմվում է Արվեստի ինստիտուտի, որի դիրեկտոր ու թատերական բաժնի վարիչ է նշանակվում Ռուբեն Չարյանը՝ պաշտոնավարելով մինչև 1987-ը:

Արվեստի ինստիտուտն իր գոյության առաջին իսկ տարիներից Ռ. Չարյանի և նրա շուրջ համախմբված անվանի գիտնականներ Ալեքսանդր Սահինյանի, Ռուբեն Դրամբյանի, Արամ Քոչարյանի, Մաթևոս Մուրադյանի և ուրիշների ջանքերով դարձավ հայ արվեստագիտության գլխավոր կենտրոնը:

Այդ ընթացքում լույս տեսավ հայրենական արվեստի բոլոր ճյուղերը ներկայացնող արվեստագիտական գրականության պատկառելի գրադարան:

Անուրանալի է Ռ. Չարյանի ավանդը հայ արվեստին նվիրված միջազգային գիտաժողովների կազմակերպման ու անցկացման գործում, ինչն Արվեստի ինստիտուտի և Միլանի հայկական ճարտարապետության ուսումնասիրության հետազոտական կենտրոնի միջև համագործակցության կարևոր արդյունքներից էր: 1975-ին Իտալիայում՝ Բերգամո քաղաքում հրավիրված առաջին գիտաժողովին մասնակցեցին աշխարհի տարբեր երկրների շուրջ 60 ճանաչված գիտնականներ (պատվիրակության ղեկավարը հենց Չարյանն էր): Երկրորդ (1978) և չորրորդ (1985) գիտաժողովները (Ռ. Չարյանը կազմկոմիտեի նախագահի տեղակալն էր) կայացան Երևանում, երրորդը (1981) և հինգերորդը (1988)՝ վերստին Իտալիայում: Դրանք զգալի ավանդ եղան ոչ միայն հայ ճարտարապետության, այլև հայկական արվեստի ուսումնասիրության բնագավառում<sup>1</sup>: 1981-ին Ռ. Չարյանն ընտրվել է Հոռմի «Տիբերինա» ակադեմիայի թղթակից անդամ:

1962-ին Ռ. Չարյանը պաշտպանել է դոկտորական ատենախոսություն, մեկ տարի անց՝ 1963-ին, նրան շնորհվել է պրոֆեսորի գիտական կոչում:

1965-ից Ռ. Չարյանը ղեկավարել է արվեստագիտության դոկտորի և թեկնածուի, ինչպես նաև ճարտարապետության դոկտորի և թեկնածուի աստիճաններ շնորհող մասնագիտական խորհրդի աշխատանքները:

Արվեստի ինստիտուտին առընթեր 1966-ին Ռ. Չարյանը հիմնադրում է Շեքսպիրագիտության հայկական կենտրոնը, որի նպատակներն էին՝ ամբողջացնել շեքսպիրյան երկերի հայերեն թարգմանությունները, նախապատրաստել ու հրատարակության հանձնել դրանց լիարժեք ժողովածուն: Պարբերաբար հրա-

<sup>1</sup> Հայաստանի Արվեստի ինստիտուտը. - «Սովետական արվեստ», 1958, № 4, էջ 80:

<sup>2</sup> Արվեստի ինստիտուտի և Միլանի հայկական ճարտարապետության ուսումնասիրության հետազոտական կենտրոնի համագործակցության շնորհիվ լույս տեսնող հայկական ճարտարապետության առանձին հուշարձաններին վերաբերող պրակները:

տարակվող «Շեքսպիրական» մատենաշարի էջերում լուսաբանվել են «Շեքսպիրը և հայ հասարակական միտքը», «Շեքսպիրյան թարգմանությունների պատմությունը», «Շեքսպիրյան պիեսների բեմական կյանքը հայ թատրոնում» և բազմաթիվ այլ թեմաներ: Կենտրոնին կից՝ Շեքսպիրի ծննդյան 400-ամյա հոբելյանի առիթով ստեղծված, իր բնույթով եզակի, այսօր Ռ. Ջարյանի անունը կրող Շեքսպիրագիտական գրադարանում հավաքված են ավելի քան 3000 գրքեր՝ աշխարհի 36 լեզուներով: Կենտրոնի և գրադարանի ստեղծման, ինչպես նաև հայկական շեքսպիրագիտության կարևոր պրոբլեմների մշակման գործում անգնահատելի է Ռ. Ջարյանի վաստակը<sup>3</sup>. նրա «Էջեր հայկական շեքսպիրապատումից» երկհատորյակը<sup>4</sup> 1981-ին արժանացավ ՀԽՍՀ պետական մրցանակի: Նշենք, որ Ռ. Ջարյանն ընտրվել է Գերմանական շեքսպիրյան ընկերության անդամ (Վայմար, Գերմանիա, 1970):

Ընդգրկուն է Ռ. Ջարյանի գրականագիտական և թատերագիտական ժառանգությունը, պատկառելի՝ նրա հրատարակած գրքերի և հոդվածների քանակը:

Նրա գրականագիտական հետաքրքրությունների կենտրոնում էր Խ. Աբովյանը<sup>5</sup>: Գրականագետը հրատարակության է պատրաստել Գաբրիել Սունդուկյանի երկերի գիտական հրատարակության երեք հատորը<sup>6</sup>: Պատահական չէ, որ Ռ. Ջարյանն ընտրվել է ԳՍՍՄ Աբեղյանի անվան գրականության ինստիտուտի գիտական խորհրդի անդամ (1943-ից) և (1977-1987), Գրականության և արվեստի թանգարանի գիտական խորհրդի անդամ (1958-ից):

Թատերագիտության բնագավառում Ռ. Ջարյանի կարևոր ներդրումը հայ բեմի մեծագույն վարպետներ Միրանույշին ու Պետրոս Ադամյանին նվիրված մենագրություններն են, ինչպես նաև ուսումնասիրությունները հայ թատրոնի այլ գործիչների մասին<sup>7</sup>:

Միրանույշին<sup>8</sup> նվիրված աշխատասիրության մեջ հեղինակը, հենվելով պարբերական մամուլում պահպանված ռեցենզիաների, նամակագրության, մեմուարային գրականության, դերասանուհու խաղընկերների և հանդիսատեսների հետ ունեցած զրույցների վրա, բացահայտել է հայ մեծ դերասանուհու պատմական դերն ու նշանակությունը: Համաշխարհային խոշորագույն ողբերգակներից

<sup>3</sup> Ռ. Ջարյան. Շեքսպիրը և հայերը, Երևան, 1967, ն ու յ ն ի՝ Շեքսպիրի հետ, Երևան, 1976, ն ու յ ն ի՝ Шекспир и армяне. Ереван, 1981.

<sup>4</sup> Ռ. Ջարյան. Էջեր հայկական շեքսպիրապատումից, հ. 1, Հայ Շեքսպիրյան թատրոնի պատմությունից, Երևան, 1979, հ. 2, Շեքսպիրը և հայերը, Երևան, 1981:

<sup>5</sup> Ռ. Ջարյան. Հայ մեծ լուսավորիչ Խաչատուր Աբովյան, Երևան, 1948, ն ու յ ն ի՝ Աբովյանի կյանքը, Երևան, 1954:

<sup>6</sup> Գ. Մ ու ի դ ու կ յ ա ն. Երկերի լիակատար ժողովածու, տեքստը պատրաստեց և ծանոթագրեց Ռուբեն Ջարյանը, հ. 1, պիեսներ, Երևան, 1951, հ. 2, Երևան, 1951, հ. 3, Պիեսներ, Արձակ երկեր, Թարգմանություններ, Հրապարակական նամակներ, Երևան, 1952:

<sup>7</sup> Բ. Յ ա р я н. Арус Восканян. Ереван, 1957. Ն ու յ ն ի՝ Հասմիկ (կյանքը և բեմական գործունեությունը), Երևան, 1970, ն ու յ ն ի՝ Վահրամ Փափազյան, Երևան, 1972, ն ու յ ն ի՝ Փափազյան, Երևան, 1988, ն ու յ ն ի՝ Էջեր հայ թատրոնի պատմությունից (1860-1870), Երևան, 1989, ն ու յ ն ի՝ Յոթ դիմանկար (էջեր հայ թատրոնի պատմությունից), Երևան, 1992:

<sup>8</sup> Ռ. Ջարյան. Միրանույշ, Երևան, 1956:

մեկի՝ Պետրոս Ադամյանին նվիրված հատորներում<sup>9</sup>, ի մի բերելով պարբերական մամուլի էջերում սփռված քննախոսականները, հիշողությունները, արխիվային փաստաթղթերը, գրած և ստացված նամակները, թատերագետը լույս աշխարհ է բերել դրանք և դրանց հիման վրա ներկայացրել մեծ դերասանի կյանքի պատմությունը, կատարել նրա բեմական արվեստի քննությունը:

«Թատերական գործիչներ»<sup>10</sup> աշխատության մեջ Ջարյանն ուսումնասիրել է խորհրդահայ բեմի ականավոր վարպետների ստեղծագործությունը, անդրադարձել նրանցից ամենանշանավորներին՝ Օլգա Գուլազյանին, Հասմիկին, Արուս Ոսկանյանին, նրանց, ում գործունեությանը հետևելու հնարավորություն է ունեցել ինքը:

Ռ. Ջարյանի աշխատությունները թարգմանվել են ռուսերեն, վրացերեն, գերմաներեն, ֆրանսերեն, իտալերեն, իսպաներեն:

Ընթերցողի առջև որպես իր պարած ժամանակաշրջանի՝ մասնավորապես XX դարի երկրորդ կեսի, հայ արվեստի պատմության «յուրահատուկ հանրագիտարան»<sup>11</sup> է հառնում Ռ. Ջարյանի հուշագրությունը՝ «Հուշապատումի» և «Մայրամուտից առաջ»-ի հատորները<sup>12</sup>, որտեղ ուրվագծվում են հեղինակի հետ շփումներ ունեցած հայ արվեստի ներկայացուցիչների դիմանկարները:

Գիտական և գիտակազմակերպական ծանրակշիռ վաստակի համար Ռ. Ջարյանը 1974-ին ընտրվել է ՀԽՍՀ ԳԱ թղթակից անդամ, իսկ 1986-ին՝ ՀԽՍՀ ԳԱ ակադեմիկոս:

Մեծ է Ռ. Ջարյանի մանկավարժական գործունեության արժեքը: 1949-1990-ական թվականներին նա «Հայ թատրոնի պատմություն» առարկան է դասավանդել Երևանի գեղարվեստաթատերական ինստիտուտում, շուրջ մեկ տասնամյակ՝ 1948-1958 թվականներին, դեկավարել է Երևանի թատերական ինստիտուտի արվեստի պատմության և տեսության ամբիոնը:

Ռ. Ջարյանի գիտական, գիտակազմակերպական ու մանկավարժական աշխատանքը մշտապես ուղեկցվել է հասարակական ակտիվ գործունեությամբ: 1974-1981 թվականներին Ռ. Ջարյանին է վստահվում ՀԽՍՀ Մինիստրների խորհրդին առընթեր գրականության, արվեստի, ճարտարապետության և քաղաքաշինության ասպարեզում պետական մրցանակների հանձնաժողովի նախագահի գործը:

<sup>9</sup> Ռ. Ջարյանն. Ադամյան. արվեստը, Երևան, 1960, և ուրիշ ի՝ Ադամյան. կյանքը, Երևան, 1961, և ուրիշ ի՝ Ադամյանի Շեքսպիրը, Երևան, 1965, և ուրիշ ի՝ Петрос Адамян. Ереван, 1985; և ուրիշ ի՝ Шекспир Адамяна. Ереван, 1964.

<sup>10</sup> Ռ. Ջարյանն. Թատերական դիմանկարներ, գիրք առաջին (Օ. Գուլազյան, Հասմիկ, Ա. Ոսկանյան), Երևան, 1956:

<sup>11</sup> Լ. Հախվերդյանն. Կյանքի, մանկավարժական, գիտական և հասարակական գործունեության համառոտ ակնարկ. Ռուբեն Վարոսի Ջարյան, Երևան, 1993:

<sup>12</sup> Ռ. Ջարյանն. Հուշապատում, գիրք 1, Երևան, 1975, գիրք 2, Երևան, 1977, գիրք 3, Երևան, 1981, և ուրիշ ի՝ Մայրամուտից առաջ. հուշագրություն, Երևան, 1988, և ուրիշ ի՝ Մայրամուտից առաջ. ինքնապատում, Երևան, հ. 1, 1988, հ. 2, Երևան, 1990:

Հայրենիքը բարձր է գնահատել Ռ. Ջարյանի վաստակը. 1961-ին նրան շնորհվել է ՀԽՍՀ արվեստի վաստակավոր գործչի պատվավոր կոչում, պարգևատրվել է «Պատվո նշան» (1953) և «Ժողովուրդների բարեկամության» շքանշաններով (1979, ծննդյան 70-ամյա հոբելյանի կապակցությամբ), ԽՍՀ Գերագույն խորհրդի պատվոգրերով (1969, 1989):

Ռուբեն Ջարյանն իր մարդկային անդիմադրելի հմայքով գերում էր շրջապատին՝ վայելելով իրեն ճանաչողների անկեղծ համակրանքն ու խորին հարգանքը:

ԱՐԱՐԱՏ ԱՂԱՍՅԱՆ